

ЗАНШАЛТА ДИКТАНТ БЭШЭЛГЭ


Буряад орондомнай үргэн дэлисэтэйгээр тэмдэглэгдэжэ байһан буряад хэлэнэй һайндэрэй үедэ Исай Калашниковай нэрэмжэтэ түбэй хотын номой сан болон 12-дохи номой сангай - филиал Россиин Федерациин Гүрэнэй Дүүмын депутат М.В.Слипенчугай тэдхэмжээр заншалта «Эрхим диктант» гэжэ мүрысөө эмхидхээ. Энэ сээжэ бэшэлгэ Россиин Федерацида боложо байһан Соелой жэлдэ зорюулагдаба.

- Түрэл хэлэндээ һонирхол дээшэлүүлхэ, буряад хэлэнэй асуудалнуудта, хүгжэлтэдэ анхарал хандуулха, дуратайшуулда эрдэм мэдэсээ шалгаха арга боломжо үгэхэ гэжэ гол зорилго эмхидхэгшэд табиһан байна, - гэжэ 12-дохи номой сангай мэргэжэлтэн, буряад хэлэ бэшэгэй эрдэмэй кандидат Цымжид Бадмажаповна Базарова тэмдэглээ.

Анха түрүүн 2012 ондо үнгэргэгдэһэн харалганда 26 - һаа 80 хүрэтэр һаһатай, элдэб мэргэжэлтэй арбаад гаран уншагшад, эдэбхитэйшүүл, буряад хэлэндээ дуратайшуул сугларжа бэшээ һэн.

Хоёрдохи харалган 2013 ондо Түбэй хотын номой сангай 12-дохи филиалда үнгэрөө бэлэй. Тэндэ номой сангай урилгаар Октябрьска районой 47 ажаһуугшад буряадаар диктант бэшэжэ, мэдэсээ шалгаа. Тэрэ мүрысөөн Улаан - Үдэ хотын Октябрьска районой 75 жэлэй ойдо зорюулагдаа һэн. 18-һаа 76 һаһа хүрэтэр элдэб мэргэжэлтэй, ондоо яһатанай зон эдэбхитэйгээр сугларжа бэшээ.

Мүнөө жэл октябриин 14-дэ Түбэй хотын номой санда Улаан-Үдэ хотын 79 ажаһуугшад сугларжа, мэдэсээ шалгаба.



Цымжид БАЗАРОВАТАЙ фото-зураг

Мүрысөөнэй эхиндэ амаршалгын үгэнүүдые Гүрэнэй Дүүмын депутат М.В.Слипенчугай түлөөлэгшэ Р.Д.Морохоева, Буряадай Засагай газарай үндэнэ яһатанай хоорондохи харилсаанай хорооной алба тушаалтан Б.В.Гындынцыренов хэлэбэ.

Диктантын текст Самбу Норжимаевай «Гурбан ногоон» гэжэ трилогий тухай толилолгоһоо абтагдаа. Эдэ үнгэрһэн 3 мүрысөөнүүдэй диктантын текстнүүд буряад уран зохёолшодой номууд тухай байдаг заншалтай. Түрүүшын диктантын текст тэрэ үедэ шэнээр хэблэгдэһэн Эрдэни-Хайбзан Галшиевай «Бэлигэй толи» гэжэ ном тухай, 2013 ондо диктантын текст Цыдып Цырендоржиевай «Хододоо үдэр байдаггүй...» гэжэ роман тухай байгаа.

Буряад орондоо мэдээжэ, дүршэл ехэтэй багшанар Жамбуева Жамбалма Дондоковна, Цыренова Цыпилма Будаевна, Цыдыпова Соелма Жигмитдоржиевна гурбан диктантнуудые анхаралтайгаар шалгаа.

21-һээ 82 һаһа хүрэтэр элдэб мэргэжэлтэй хабаадагшадай һайнаар бэшэһыень жюри онсо тэмдэглээ. Буряад хэлэнэй мэргэжэлтэд хабаадаха эрхэгүй байба.

Жюриин диктант шалгаха үедэ хабаадагшадта халуун сай дурадхагдаа, буряад кино харуулаа, буряад шүлэгүүд, дуунууд зэдэлээ.

Дүн согсологдожо, илагшад тодорбо. Буряадай гүрэнэй университетэй оюутан Лыгденова Зоя Жамсаевна - нэгэдэхи һуури, Бухаев Владимир Очирович ба Галсанова Цырендулма Очировна - хоёрдохи һуури, Балданова Цындыма Цыдыповна, Ешеева Цыпилма Ешеевна гэгшэд гурбадахы һуури эзэлбэ. Энэһэнээ гадна Дашиева Дулгарма Дашиевна - "Үндэр һаһатай", Хормонов Сергей Валерьевич - "Эгээл залуу", Лиджиева Светлана Түмэнбаировна - "Эдэбхитэй хабаадагша", мүн "Гурбадахияа бэрхээр бэшэгшэ" гэхэн тусхай шангуудта хүртэбэ.

- Гүрэнэй Дүүмын депутат Михаил Викторович Слипенчугай тэдхэмжээр бүхы мүнгэн шангууд барюулагдаа. Диктантын дүнгүүдые согсолходоо, буряадаараа уран гоёор хэлэжэ, бэрхээр бэшэжэ шадаха зон олон гэжэ тэмдэглэмээр байна, - гэжэ эмхидхэгшэдэй зүгһөө Цымжид Базарова тэмдэглэбэ.

**Цырема
САМПИЛОВА.**